

**Sud Bosne i Hercegovine**  
**Суд Босне и Херцеговине**

**Broj: S1 3 Iž 041140 21 Iž**  
**Sarajevo, 06.09.2021. godine**

**IZVORNIK!**

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović kao predsjednika vijeća, Vesna Trifunović i dr. Branka Moraita kao članova vijeća, odlučujući o žalbi Biljane Ristić iz Teslića ul. Jovana Dučića LS/4 izjavljenoj protiv rješenja Centralne izborne komisije Bosne i Hercegovine broj: 06-01-07-1-415/21 od 12.08.2021. godine o davanju saglasnosti na imenovanje članova Opštinske izborne komisije, dana 06.09.2021.godine, donio je

**R J E Š E N J E**

**Žalba se odbija.**

**O b r a z l o ž e n j e**

Rješenjem Centralne izborne komisije BiH broj i datum navedeni u uvodu, stavom 1 izreke, data je saglasnost na odluku Skupštine opštine Teslić broj 01-111-187/21 od 29.07.2021. godine kojom su na dužnost u članstvu Opštinske izborne komisije Teslić imenovani članovi Biljana Božić, Miladin Gotovac i Marica Đurić.

Stavom 2 izreke rješenja Centralne izborne komisije BiH, nije data saglasnost na isto rješenje Skupštine opštine Teslić u dijelu kojim se na dužnost u članstvu Opštinske izborne komisije Teslić imenuje Almir Durmišević.

Protiv rješenja Centralne izborne komisije BiH, blagovremeno je podnijela žalbu Biljana Ristić u dijelu kojim je data saglasnost na odluku Skupštine opštine Teslić kojom su na dužnost u članstvu Opštinske izborne komisije Teslić imenovani članovi Biljana Božić, Miladin Gotovac i Marica Đurić, dakle, u dijelu stava 1 rješenja. Navodi da je izbor navedenih kandidata proizvod proizvoljnosti u radu Opštinske komisije za izbor i imenovanje koja je diskvalifikovala sve kandidate koji su po struci pravnici. Ukazuje da odredba člana 2.5 stav 2 Izbornog zakona BiH i član 2 stav 4 Uputstva o utvrđivanju kvalifikacija, broja imenovanja, razrješenja i obuke članova izbornih komisija, upravo pravnim stručnjacima daje prednost. Pri tome izabrana članica Marica Đurić ne ispunjava uslove jer ima završenu srednju školu, a niko od izabranih kandidata nije po struci pravnik. Smatra da je izbor politički motivisan, što potvrđuje i činjenica da je u Tesliću, kao maloj sredini, ishod konkursa bio unaprijed poznat.

Predlaže da se žalba uvaži, poništi osporavano rješenje, donesne meritorna odluka ili naloži CIKu BoiH da ponovo provede postupak.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu, ukazujući da je data saglasnost na imenovanje na dužnost u članstvu Opštinske izborne komisije za lica koja ispunjavaju sve opšte i posebne uslove. Pri tome na rang listi žaliteljica je osvojila 50 bodova dok su izabrani kandidati osvojili 74, 72 i 68 bodova.

Žalba nije osnovana.

Rješenjem Centralne izborne komisije broj broj: 06-01-07-1-415/21 od 12.08.2021. godine data je saglasnost na odluku Skupštine opštine Teslić broj 01-111-186/21 od 29.07.2021. godine kojom su na dužnost u članstvu Opštinske izborne komisije Teslić imenovani članovi Biljana Božić, Miladin Gotovac i Marica Đurić.

Iz stanja spisa proizlazi da je Centralna izborna komisija BiH utvrdila da je prilikom imenovanja člana Opštinske izborne komisije Teslić ispoštovana procedura za imenovanje propisana u članu 7 Uputstva o utvrđivanju kvalifikacija, broja i imenovanja članova izborne komisije osnovne izborne jedinice u BiH (Službeni glasnik BiH br. 29/18 i 36/19). Dalje je utvrđeno da imenovani članici ispunjavaju sve opšte i posebne uslove propisane Izbornim zakonom BiH i Uputstvom, pa je time Centralna izborna komisija BiH, pri donošenju ožalbene odluke, ispitala sve okolnosti relevantne za davanje saglasnosti u skladu sa članom 10 stav 2 Uputstva i člana 2.12 stav 5 Izbornog zakona.

Uvidom u dokumentaciju koju je Opštinska izborna komisija Teslić, u smislu člana 10 stav 1 Uputstva, uz zahtjev za davanje saglasnosti dostavila Centralnoj izornoj komisija BiH utvrđeno je da je kandidatkinja Marica Đurić stekla visoku školsku spremu što potvrđuje diploma Tehnološkog fakulteta u Tuzli sa stručnim nazivom diplomirani inženjer tehnologije izdata pod brojm 1741/87 dana 13.11.1987. godine. Nadalje, relevantni dokazi potvrđuju da kandidatkinja Biljana Božić posjeduje izbornu iskustvo od 2014.-2020. godine kao član i predsjednik biračkog odbora, da Miladin Gotovac ima izbornu iskustvo 1998. godine kao član lokalne izborne komisije i 2012. godien kao član biračkog odbora, te da je Marica Đurić od 2014. godine član Opštinske izborne komisije.

Proizilazi da žalba neosnovano ukazuje da je izabrana kandidatkinja Marica Đurić sa završenom srednjom školskom spremom. Nadalje, žalba se neosnovano poziva na primjenu odredbe člana 2.5 stav 2 Izbornog zakona BiH u pogledu smjera stručne spreme kandidata jer se citirana odredba odnosi na članove Centralne izborne komsije Bosne i Hercegovine, a ne na članove izbornih komisija osnovne izborne jedinice u BiH. U konkretnom slučaju na smijer stručne spreme, kao poseban uslov, primjenjuju se odredbe člana 2 stav 1 Uputstva o utvrđivanju kvalifikacija, broja i imenovanja članova izborne komisije osnovne izborne jedinice u BiH koja pod tačkom b) propisuje da kandidat mora imati završen fakultet, VII/1 stepen stručne spreme ili završen fakultet Bolonjskog sistema studiranja s najmanje 180 ECTS i pod c) da mora imati iskustvo u provođenju izbora. Time relevantnom odredbom nije uslovljeno da kandidat za člana izborne komisije osnove izborne jedinice mora imati

završen pravni fakultet. Stavom 4 citirane odredbe regulisani su izuzeci u odnosu na posebne uslove iz stava 2, među kojima je da izuzetno može biti biran kandidat sa završenim pravnim fakultetom i bez izbornog iskustva, međutim u konkretnom slučaju izbor članova komisije vršen je po redovnoj proceduri, a ne zbog ostvarivanja ulova za primjenu propisanog izuzetka.

Budući da je osporenim rješenjem CiK BiH dao saglasnost na izbor članova Opštinske izborne komisije Teslić koji imaju završen fakultet, potrebno izborno iskustvo i ostvarili su veći broj bodova na konačnoj rang listi u odnosu na žaliteljicu, proizilazi pravilnost zaključaka da imenovani članovi ispunjavaju propisane opšte i posebne uslove utvrđene Izbornim zakonom Bosne i Hercegovine i Uputstvom.

Iz navedenih razloga Apelaciono vijeće nalazi da je pobijano rješenje Centralne izborne komisije Bosne i Hercegovine pravilno i zakonito, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine (Sl.glasnik BiH broj 19/02, 88/07 i 83/08) valjalo odbiti.

**PREDSJEDNIK VIJEĆA  
S U D I J A  
Zvezdana Antonović**